

道听途说

一
函六册



道聽塗說卷之五

涇邑潘綸恩燁玉氏著

洪大生

洪大生米商也性和緩寡言語而有拳棒絕技雖膠漆深交莫有知其能者蓋名雖爲商實大盜也家于句容以劫掠爲箕裘者至大生已沿七世未嘗略露破綻大生年六十膝下兒孫羅列無願承家學者咸勸其早就菟裘大生亦自以貽謀非善思輟業爲改絃之計其歲在京口劫一典鋪獲巨金用以販米滿擬糶畢旋歸亭週甲大慶作團圓宴道僮取樂此後息影田園悉太平歲月矣于是載米盈艘其妻老健婆司舸焉繫纜常州方投行問價而舢艫叢雜鱗次相依忽有扁舟來投左推右訐插檣于並舫間先是洪劫典鋪時鋪養一鸚鵡其舌關之靈活

語言之慧黠爲洪所稔知因併取以歸懸于船之尾梢是日鳥見舟來連呼捕至而舟果因典鋪案追捕緊急奉票緝訪者聞鳥語大惑乃僞託估客過洪船尋問米價洪夥言貨主未至無主價者拒客不售客故嘯叨絮聒而鳥語尤多不檢夥忽取籠箠之客益信米船之爲盜矣計欲捕之唯恐強弱不敵乃留數捕默伺船側而以情報于縣並請營弁同力合捕民壯營兵凡數十把總導其前圍船數匝盜知不能脫乃就繫惟洪婦拒捕甚力無敢犯者把總自握鐵鞭盛氣下艙捕婦婦以脚跟飛蹴把總脫于艙直撲船頭兵懼婦竄合數十人聯臂擁入始就縛焉

譚園氏曰洪大生爲盜七世而不陷于法網幾疑孽報可追矣不謂七世之惡一鳥殄之雖罪惡貫盈爲天譴所不能逃然鳥第孱然一物耳

而竟破巨案安在微弱者之可易而侮之哉

盜婆

戊戌己亥間余在皖城府署時刼江多盜恒報巨案不獲捕役奉票巡緝日伺埠口覩一客船連泊五六日客多不船宿間日一歸船輒有重負捕疑其爲盜而不能決一日見客回埠船爲隣舫所擠去岸稍遠客躍而登船是有長技者兩捕尾其後亦疾躍以登搏盜獲之船尾有少婦盜婆也姿容俊美見捕至意甚惶窘盡出盜凶器投諸水捕見其黠因并擒以歸盜至公庭雖受重刑堅不吐實婦亦屢鞫無供乃繫諸官媒家媒擅口給多以美詞飭婦婦終不承人聞盜婆美願見者踵至絡繹不絕於道盜婆之名日掛人口如是者一月有奇婦意漸不自安告官媒曰盜非吾匹也吾父爲某縣少尉夫某甲刑幕某公之嗣君也不

幸吾父捐館甲父亦逝世夫婦兩口並失倚庇遂括行橐爲旋里計歸裝頗不寂寞誤質盜船至豫章界夜泊孤港蘆葦叢雜月色蒼茫數盜對酌船頭酒酣呼甲共飲甲至船頭甫聞喊救一聲已爲羣盜所殺尋復掖妾出船頭示以頭顱卽舉屍拋棄江中羣盜擁妾侑觴時雖心銜冤憤懼蹈白刃不敢拒也身旣被汚盜雖匪類亦衣食所賴遂無意爲前夫訟冤矣然妾究良家女盜婆之名不堪聒耳所由願白衷曲也官媒以婦言告于官官復訊婦錄口詞一如官媒所告更據婦詞問盜盜知不能諱遂盡承諸盜案初或委桐棺一口于大通道旁叢莽中腐朽之臭過者掩鼻茲偕數卒至其地開棺取賊白銀依然所腐者一死犬耳盜恚曰通衢大道車馬雲屯何無一福相兒消受數千金耶

簿園氏曰甚矣婦人之不仁也當甲婦之歸盜也新好方敦雖復冤深

似海亦所不顧其於盜也被獲之初猶戀戀有枕席情迨積候月餘寢久寢忘既知盜獲必死懽好不能復諸因而下井更投石焉不然盜婆之名彼從盜行劫時豈不自知必待人之呼之而始恍然悟耶

扶路僊僮

隆興民某甲少年孤露傭爲瞽目者作扶路僊僮性狡黠多巧思嘗以木板刻兩龍每夕仰臥其上兩龍印背有痕瞽者以星命術日出爲人決休咎甲因竊記其生庚編簿而筆載之積數既繁遂于簿載生庚下條註以官曰某也將某也相以及大僚末秩臚列詳整而盛稱持齋之效肆誇高爵厚祿惑人以享報之隆又自書己名弁諸簿首云當立某甲爲教主琢石函函其簿於去市里許之高阜大樹下瘞之深更陰晦時效陳涉篝火狐鳴之術暗裏硝硫就瘞簿處而然焉市之人遙見樹

陰閃閃飛燼光燄爛然羣相驚怪往掘樹下得石函發之見署筆皆近人姓氏生庚且題其尾曰勸得一人戒葷者陰隲若何當得官若何由是而以勸十人以勸百人獲福有加焉據妖妄之談致人心蠱惑一時茹素者靡然從風祇以教主姓名久未得其人繁議不決或言某警者之扶路僣僮背有龍紋且其姓與簿首合因而共相其背謂是貴不可言者乃立僣僮爲教主轉相傳奉而某教主之名遂紛譟一時撫軍恐其爲亂也謀委員捕之諸官欣然無敢承者川省某公由翰林改官新授江西某縣令聞之銳身請任率兵宵往圍而捕之持齋者中夜聞兵急切謀遁多有蹀起者慘泣悲啼一時騰沸而重圍鐵桶竄脫無門惟有各覓死所以避斷頭之慘人無老幼聚族俱殲投繯者難以數計村落間凡一池一沼無不填屍橫溢公爲大索旬日教主某甲影響俱無

惟獲有教主之副獻俘鈴轅撫軍以渠魁未得責令窮搜乃更遣幹役
四出蹤跡按戶稽查嚴詰行李往來關津略難偷漏旅店凡宿一客必
查名註簿荒陬遐谷無不搜求殆遍而某教主如樓中黃鶴愈益杳然
誠不省迷亂時或蹈隙遠颺抑逃生無路積屍堆壘中與無名枉死鬼
俱填溝壑是役也同僚相賀俱謂官階拾級從此無能測量矣公亦以
敢作自負然雖捕賊有功終以要犯漏網一官仍舊雖註升階未膺懋
賞而兵燹之餘至于人烟俱斷固不盡委之劫數也

籀園氏曰茹素求福愚民之見比比皆然徒黨既繁釀成巨案事亦往
往而有思患預防而禁絕之拿辦之固牧民者所有事然須先行示諭
開其愚昧而予以自新至怙惡不悛而後加懲創焉未可不教而誅也
況殄千百生靈以冀一官高顯是又與愚民之茹素祈福者同一罔念

矣雖然此等固失之刻而較諸託爲開導解散以免濫刑而實則一籌莫展養癰貽患者猶有作爲也江西省會傳有朱謀理者駢脇而駢齒以叛逆聞捕而未獲或謂扶路僇僮卽朱謀理其人駢脇之說特傳言之訛耳捕逆某公後官皖城余嘗客其幕中聞其自訟云當日若知朱謀理終不可迹則一時逆黨誰不可作朱某申報者如果駢脇駢齒則有異相可據又誰敢作僞託想哉

馬秀清

馬氏秀清滑縣庠生馬逸三之女也襁褓時星者楊瞽兒推生庚謂女命不利于父母父母惡之遂委女農人苗賢寶家爲養媳三年賢寶死星者鮑瞽兒謂係女命蹇敗促翁天年苗婦又惡之送女還馬馬不能却留養于家李文成之作亂于滑縣也女年十二矣時逸三方赴試郡

中女隨母避難出走行三十里爲土寇所掩女避叢棘中寇退而出失
母所在號泣以呼不知所向路逢眇道士謂女毋泣當攜以覓母因隨
道士以去逡巡凡三日卒不得母女不欲行道士曰不行寇且至白刃
加頸矣留欲待死耶不得已唯聽道士所之行二十餘日達山東界道
士醫女于富翁荀某家爲婢荀婦芮氏年未五十兩目青盲性極暴烈
御下苛刻稍不如意鞭笞亂下或欺其瞽假物承杖芮覺鞭不著肉則
震怒倍加非刑更酷矣荀翁惡芮不情知秀清嬌弱不堪其虐匿置他
室雖列名青衣眠食無異主人羣婢妒其寵隱訴諸芮芮佯不聞直俟
荀翁遠出乃取而褫其羅綺易以粗疎役使操作甚于他婢喜怒從心
撻辱備至不匝月而垢面蓬頭形銷骨立荀翁歸覲面幾不相識目覩
慘毒雖甚憐憫而莫可救止一夕盜入其室盡擄所有殺芮氏掠秀清

以去盜林姓有女名蟾英見秀清悅之請于父留爲義女而姊妹呼之
愛若同胞林父女本賣拾錦耍戲者蟾有絕技滾鞍走馬諸戲任情顛
倒愈出愈奇周歷江湖伙家繁衆隨行養一獼猴畫賣戲耍夜資竊盜
每穴富家墻去半磚成小洞縱猴入啓扉納賊一時報竊者案多類是
莫明其故偶邑令出郊見林之猴戲疑之令捕役細檢穴隙果得猴毛
數莖遂逮捕其衆林父女疾竄得脫乃更廣招無賴哨聚作響馬及得
秀清從蟾習拳棒數月書傳其技每有劫掠姊妹聯袂以行掛鬚塗臉
狼狽相依益肆行無忌既屢劫大案郡縣捕之不獲乃請于上臺集兵
會剿林與蟾皆就縛惟秀清漏網晦容乞食至壽春界隨一縫窮婦藉
針綫作生活偶一日縫紉于湖船上有金陵巨商窺而豔之商霍姓名
桂馨自言以斷絃之故期擇佳偶願出二百金購女縫窮婦利其金亦

勸女當定終身計女始意以生質英奇才兼文武家世係出儒門冀得一士人而事之至是以婦再三勸駕且霍商年少多金容貌亦頗不陋乃屈意從之不謂霍言斷絃者誑也室有結髮湯氏亦兩睫俱盲者巨軀健臂運船盈尺貌不亞于無鹽霍攜女歸湯聞大怒解裙懸于戶令女穿裙底以入跪而聽教俯伏不使起穢罵百端呼婢示之杖謂嗣後稍不用命此其家法也跪一炊時婢媼輩再三排解始叱令起霍本天閭與湯常異榻久不作宗祧想矣爾日於湖船上見秀清頓覺黍谷回春頗思人道疑有天緣作合故不惜重聘購之湯之與霍既無枕席情復何所容其妒祇以仇怨結自前生故但聞女名便覺心頭火起動止俱爲不可湯雖悍暴而性喜諛且不耐挾制婢媼輩或以甘詞貢媚或逞橫逆要取金帛多得如願獨於女一絲一粟珍若瓊瑤每日閉置高

樓數米給餐不溢一粒而伺應起居恒終夜追呼不令交睫供給稍遲
輒扑立至含辛茹苦不下樓階者已三年矣霍以悞女之故情良不忍
計欲攝女以出因樓窗旁臨深巷乃密遣心腹媼以布遺女約夜深人
靜時懸布縫下已當待于樓畔迂遷別館再圖長策女故擅絕技特自
安薄命不謀遁耳盈丈之樓豈藉布力者及期躍而下夜色冥晦見有
少年立巷側不暇深詰卽聯袂以行行不擇徑隨步疾馳俄及城墉少
年曰雉堞高峻奈何女言無害卽伸臂掖少年躍而下于城仍趨不停
趾行三十里天始曙乃知所隨非霍因問少年何來少年自言姓談名
榮昌江西之餘干人數年作緞商不予而母且虧折因爲債券所逼挾
數十金謀宵遁適遇擊柝者過街偶避深巷中幸而遇卿亦天緣也女
亦以情告但諱言爲人造室謂係富家侍婢不容于主母是以竄耳兩

願誓爲夫婦同回餘干遂買棹以行舟至三山爲石尤風所阻日已向
夕一客肩負重裹來乞附舟客厲眼虬髯身材雄偉談意爲綠林之雄
也辭不允女言有我在雖盜不足畏乃許之置褥外艙與之語質朴平
易飲之酒至數升無醉容由是日共杯酌習以爲常一日舟至板子磯
天已昏暮舟人尙催槳擬進宿荻港女不欲行遂就泊焉一更向盡客
艙寂然談疑客倦睡攜樽趣之不應撫之冰矣大駭告女女出檢視客
囊有蒜金二十四條及書一封蓋因盜魁被獲于豫章客夤緣得此書
致某書吏餉金關說者女曰頃泊棹時見路旁荆棘中一巨棺狀似新
停而無片席掩覆疑係刼盜藏金僞託者留泊之意實欲俟深夜試探
其異然以客在不無礙眼今此遇良得請先往視棺眞僞客固易置也
因握利刃躍而登岸舉其棺綦重非比尸骸攪善啓視燦燦朱提數當

萬計欲連以歸舟恐爲舟子所覺乃挾客尸加金上蓋棺如故比曉佯呼失竊謂客已攫金遁矣客貌固類盜無疑其詐者舟行更數日抵皖城遂捨而登岸投裝旅店中伺買得一小舟談以久慣江湖頗諳執楫乃與女共駕順風揚帆復回板磯盡取棺中金至金陵償還債券重理舊業多財善賈獲息恒數倍遂建置房屋產而家于金陵更自備一滿江紅座船簾帷几榻修飾精工凡商販往來必夫婦偕行劫盜恃以無恐一日維舟邗上有跛丐引一盲嫗肩禾稽一束半氈裹其身百孔玲瓏股膊皆露狂叫船邊僕輩怒罵之嫗曰富貴不足恃何便作此態向人丐豈生而貧者五年前猶是豪家主母一呼百諾稍不如意雷霆震驚威福之作曷嘗知有今日哉僕愈怒曰賊殺婆汝以爲人人似汝耶胡枉作毒口噴人奮拳撩袖將痛懲之秀清聞喧鬨聲自簾隙窺視見

盲丐疑是湯氏遺婢出詢果湯也因細詰之丐言家本豪富五年前主翁死家漸落又遭回祿所有一室自顧無以度日只得倚瓢杖作生涯所從跛丐野合得之也秀清憐其困以青緜兩貫給之丐銜感厚惠詢訪姓名知爲馬女乃悔曰仇怨相逢猶以德報倘當日起居間稍加以顏色尚可冀半世太平餐飯也咨嗟淚洩而去馬舟亦因順風解纜嗣是雲泥分隔不復再知湯氏矣

繆圖氏曰馬氏墮胎時卽爲瞥兒所困自是以往所遇無非矐者遂致困苦顛連而飛騰之技埋沒無聞馬與無眼兒豈真有夙世之冤哉雖然茫茫世宙眼如鏡者幾人自來才人傑士不逢青眼者指不勝屈於湯乎何尤焉

張黃狗

張黃狗旌德人爲緞鋪掌櫃一夕晚歸路出呂家巷口覩一麗人豔妝華服臉暈桃花似從酒筵散歸者一丫髻婢籠燈導其前婢固識張者呼問張掌櫃何來張泛應之手擣烟竿就燈乞火吸烟而去麗人者左婦也張旣過婦呼婢問張居址婢悉告之明日婢至鋪招張言主母將有裁製乞移趾商尺寸焉張往婦具精饌留飲于室張曰卿一妙齡麗婦秉燭留私人夜飲不畏人言耶婦曰夫以行商遠出恒數歲不歸伯氏爲武庠生住舍隔絕妯娌不甚聞問相從只此婢妾之心腹也無爲作梗者昨晚相逢邂逅卽欲邀過寒舍祇以甫經識面未免慚于啓齒然已終夜旁徨不能成寐不識男兒意念會否有同心焉張曰甚於婦人兩情繾綣遂共綢繆自是往來無間牀頭阿堵物亦恒得其扶助時屆秋穫登場張爲居停主人徵租鄉間同夥有李黑狗者藉稱爲張寄